

Na osnovu člana 10. Zakona o turističkim zajednicama ("Službene novine Tuzlanskog kantona" broj 11/15) i Odluke Vlade Tuzlanskog kantona ("Službene novine Tuzlanskog kantona", broj: ), Skupština Turističke zajednice Tuzlanskog Kantona, uz prethodnu saglasnost Ministarstva trgovine, turizma i saobraćaja Tuzlanskog kantona, broj 05/1-22-16717/16 od 04.07.2016.godine, na XI-2016 sjednici održanoj 08.07. 2016. godine, d o n o s i

## **STATUT TURISTIČKE ZAJEDNICE TUZLANSKOG KANTONA**

### **Član 1. (Predmet Statuta)**

Ovaj statut sadrži odredbe o:

- a) nazivu i sjedištu turističke zajednice,
- b) zadacima turističke zajednice,
- c) pravima, obavezama i odgovornosti članova turističke zajednice,
- d) načinu predstavljanja i zastupanja turističke zajednice,
- e) djelokrugu, ustrojstvu, načinu izbora i opoziva, mandatu te odgovornosti članova organa turističke zajednice,
- f) načinu odlučivanja u turističkoj zajednici i tijelima turističke zajednice,
- g) načinu ostvarivanja javnosti rada,
- h) načinu donošenja statuta i drugih općih akata,
- i) imovini, načinu stjecanja imovine i raspolaganju imovinom,
- j) postupku s imovinom u slučaju prestanka turističke zajednice,
- k) drugim pitanjima od značaja za rad Turističke zajednice Tuzlanskog kantona ( u daljem tekstu: Turistička zajednica Kantona).

### **Član 2. (Osnivač)**

Osnivač Turističke zajednice Kantona je Vlada Tuzlanskog kantona (u daljem tekstu: Vlada Kantona) na osnovu Odluke o osnivanju Turističke zajednice Tuzlanskog kantona ("Službene novine Tuzlanskog kantona, broj: 07/16)

### **Član 3. (Ciljevi)**

Ciljevi osnivanja Turističke zajednice Kantona su:

- a) unapređenje opštih uslova boravka turista kroz formiranje cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta Tuzlanskog kantona ( u daljem tekstu: Kanton);
- b) razvijanje svijesti o važnosti turizma, kao i privrednim, društvenim i drugim efektima turizma, o potrebi i važnosti očuvanja i unapređenja svih elemenata turističkog proizvoda određenog područja, a posebno zaštite životne sredine;
- c) podsticanje razvoja turističke infrastrukture i pružanja informacija turistima;
- d) promocija turističkog proizvoda Kantona.

#### **Član 4.**

##### **(Naziv i sjedište)**

- (1) Naziv turističke zajednice je: “Turistička zajednica Tuzlanskog kantona”.
- (2) Skraćeni naziv turističke zajednice je: “TZ TK”.
- (3) Sjedište Turističke zajednice Kantona je u Tuzli, Muftije ef. Kurta br.1.

#### **Član 5.**

##### **(Pečat i štambilj)**

- (1) Turistička zajednica Kantona ima pečat okruglog oblika, promjera 35 mm, sa tekstom ispisanim u koncentričnim krugovima, slijedećeg sadržaja: “Turistička zajednica Tuzlanskog kantona-Tuzla”.
- (2) Štambilj Turističke zajednice Kantona je četvrtastog oblika, veličine 65 x 30 mm, i ima tekst: “Turistička zajednica Tuzlanskog kantona-Tuzla”, te prostor za upisivanje evidencijskog broja i datuma prijema podneska.
- (3) Svaki pečat i štambilj imaju redni broj.
- (4) O broju pečata i štambilja, načinu korištenja, te licima koja su odgovorna za njihovo čuvanje, odlučuje Turističko vijeće Turističke zajednice Kantona (u daljem tekstu: Turističko vijeće) na prijedlog voditelja turističkog ureda Turističke zajednice Kantona (u daljem tekstu: voditelj turističkog ureda).

#### **Član 6.**

##### **(Znak i maskota)**

- (1) Turistička zajednica Kantona ima znak i maskotu.
- (2) Odluku o obliku i sadržaju znaka i maskote donosi Turističko vijeće, na osnovu javnog konkursa.
- (3) Znak Turističke zajednice Kantona se koristi na memorandumima, prospektima, plakatima i drugim informativno-propagandnim materijalima, čiji je izdavač ili suizdavač Turistička zajednica Kantona, odnosno na drugim promotivnim materijalima ili aktivnostima u kojima Turistička zajednica Kantona ima organizatorsku ili sponzorsku ulogu.

#### **Član 7.**

##### **(Zadaci)**

- (1) Osnovni zadaci Turističke zajednice Kantona su da:
  - a) objedinjava turističku ponudu Kanton;
  - b) upravlja javnom turističkom infrastrukturom datom na upravljanje od strane Kantona;
  - c) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti i usluga, koji čine integralni turistički proizvod;
  - d) učestvuje u izradi i vrši promociju plansko-projektne, plansko-razvojne i investicione dokumentacije iz oblasti turizma i njima komplementarnih djelatnosti;
  - e) preduzima mjere i aktivnosti na kreiranju turističkog proizvoda i turističkog imidža Kantona, kao i radnje na formiranju marke turističkog proizvoda destinacije;
  - f) radi na inoviranju turističkog proizvoda i aktiviranju novih turističkih prostora;
  - g) radi na ustrojavanju jedinstvenog turističkog informacijskog sistema, sistema prijave i odjave turista i statističke obrade prema turističkim zajednicama nižeg nivoa organizovanja;
  - h) saraduje u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata;
  - i) radi na istraživanju turističkog tržišta u cilju pozicioniranja turističkog proizvoda na turističkom tržištu;
  - j) prati stanje na turističkom tržištu u cilju pravovremenog donošenja odgovarajućih odluka;

- k) na osnovu izvještaja lokalnih turističkih zajednica, prati, analizira i ocjenjuje izvršavanje njihovih planova i programa, utvrđenih zadataka i uloga, s posebnim naglaskom na svrsishodnost i urednost trošenja sredstava;
  - l) usklađuje interese, pruža podršku i koordinira načine izvršenja svih planskih i programskih zadataka svih turističkih zajednica na prostoru Kantona;
  - m) preduzima mjere i aktivnosti za razvoj i promociju turizma u turistički nerazvijenim dijelovima Kantona;
  - n) promovira turističku ponudu Kantona u zemlji i inozemstvu;
  - o) obavlja informativne poslove u vezi s turističkom ponudom;
  - p) saraduje sa turističkim zajednicama u BiH, u zemaljama u okruženju, Evropi i svijetu;
  - q) podstiče, unapređuje, promovira i štiti izvorne vrijednosti i stvara uslove za njihovo korišćenje u granicama održivog razvoja turizma Kantona;
  - r) koordinira na poslovima razvoja turizma na lokalnom, entitetskom i državnom nivou;
  - s) radi na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na kome djeluje turistička zajednica;
  - t) obavlja i druge poslove od javnog interesa povjerene od strane Ministarstva.
- (2) Turistička zajednica Kantona će sudjelovati i provoditi programe i akcije drugih oblika organizovanja koji su od zajedničkog interesa za sve subjekte u turizmu, a s ciljem podizanja nivoa kvaliteta turističke ponude F BiH i BiH.
- (3) Turistička zajednica Kantona suraduje s regionalnim turističkim organizacijama iz drugih zemalja i može biti članom međunarodnih turističkih organizacija.

## **Član 8.**

### **(Članovi Turističke zajednice Kantona)**

- (1) Obavezni članovi Turističke zajednice Kantona su turističke zajednice grada/općina i turističke zajednice područja osnovane na teritoriji Kantona.
- (2) Dok se ne osnuju turističke zajednice grada/općine, odnosno turističke zajednice područja, obavezni članovi Turističke zajednice Kantona su sva pravna i fizička lica koja na području grada/općine imaju sjedište ili bilo kakav organizacioni dio i koja ostvaruju prihod pružanjem ugostiteljskih ili drugih turističkih usluga ili obavljaju djelatnosti neposredno povezane s turizmom.
- (3) Turističke zajednice općina/gradova i turističke zajednice područja postaju obavezni članovi Turističke zajednice Kantona danom njihovog upisa u Upisnik turističkih zajednica.
- (4) Danom upisa turističkih zajednica općina/gradova, odnosno turističkih zajednica područja u Upisnik turističkih zajednica prestaje članstvo obaveznim članovima iz stava (2) ovog člana koji u toj općini/gradu, odnosno području imaju sjedište ili bilo kakav organizacioni dio.
- (5) Skupština Turističke zajednice Kantona, na prijedlog Turističkog vijeća, može osobe posebno zaslužne za razvoj i promicanje turizma, imenovati počasnim članovima Turističke zajednice Kantona.
- (6) Počasni članovi ne mogu birati niti biti birani u organe Turističke zajednice Kantona.

## **Član 9.**

### **(Prava i dužnosti članova)**

- (1) Članovi Turističke zajednice Kantona imaju slijedeća prava, obaveze i odgovornosti:
  - a) birati predstavnike u organe Turističke zajednice Kantona;
  - b) putem svojih predstavnika upravljati poslovima Turističke zajednice Kantona;
  - c) davati inicijative koje imaju za cilj jačanje i unapređenje turizma na području Turističke zajednice Kantona;
  - d) davati prijedloge i primjedbe na rad organa Turističke zajednice Kantona;

- e) predlagati razmatranje pitanja iz djelokruga Turističke zajednice Kantona i davati prijedloge za njihovo rješavanje;
- f) predlagati sudjelovanje Turističke zajednice Kantona u raznim manifestacijama (kulturnim, sportskim i drugim priredbama) i događajima značajnim za cijeli Kanton, FBiH, i šire;
- g) predlagati pomaganje razvoja turizma u mjestima na području Turističke zajednice Kantona koja nisu turistički razvijena;
- h) putem Turističke zajednice Kantona ostvarivati saradnju sa nadležnim tijelima lokalne samouprave i uprave na pitanjima rješavanja poremećaja u turizmu i većih problema u ostvarivanju privrednih interesa u djelatnostima ugostiteljstva i turizma i s tim djelatnostima neposredno povezanih djelatnosti, koja su od značaja za područje Kantona;
- i) razmjenjivati u Turističkoj zajednici Kantona informacije, obavljati konsultacije i informisati ostale;
- j) predlagati izmjene i dopune statuta i drugih općih akata te se pridržavati odredbi statuta, odluka, zaključaka i drugih akata tijela Turističke zajednice Kantona;
- k) razvijati međusobnu odgovornost za provođenje zadataka Turističke zajednice Kantona;
- l) davati podatke i izvještaje potrebne za izvršenje zadaća Turističke zajednice Kantona;
- m) biti obaviješten o radu Turističke zajednice Kantona i njenih tijela;
- n) tražiti podršku za obavljanje svojih zadataka;
- o) uplaćivati članski doprinos.

## **Član 10.**

### **(Organi Turističke zajednice Kantona)**

- (1) Organi Turističke zajednice Kantona su:
  - a) Skupština Turističke zajednice Kantona,
  - b) Nadzorni odbor
  - c) Turističko vijeće.
- (2) Članovi organa odgovorni su za zakonito i savjesno obavljanje svojih dužnosti.
- (3) Mandat članova organa Turističke zajednice Kantona traje četiri godine, a mogu biti ponovno birani, odnosno imenovani najviše još jedan mandat.
- (4) U slučaju prestanka mandata člana organa prije isteka vremena na koje je izabran, novi član se bira ili delegira na vrijeme do isteka mandata na koji je izabran prethodnik.
- (5) Članu u organima iz stava (1) ovog člana mandat može prestati i prije isteka vremena na koje je izabran:
  - a) pismenim opozivom članice čiji je član predstavnik ili osnivača,
  - b) na lični zahtjev,
  - c) u drugim opravdanim slučajevima (teža bolest, smrt, invalidnost koja objektivno onemogućava vršenje ove funkcije, sukob interesa i slično).
- (6) Skupština Turističke zajednice Kantona Turističke zajednice Kantona može, od članice čiji je član predstavnik ili od osnivača, zatražiti opoziv člana organa iz stava (1) ovog člana ukoliko on svoju dužnost ne obavlja u skladu s ciljevima i zadacima Turističke zajednice Kantona, a na prijedlog predsjedavajućeg Skupštine Turističke zajednice Kantona (u daljem tekstu: Skupština Turističke zajednice Kantona) i Turističkog vijeća Turističke zajednice Kantona (u daljem tekstu: Turističko vijeće).
- (7) U slučaju predviđenom stavom (5) ovog člana Skupština Turističke zajednice Kantona donosi odluku o prestanku mandata.
- (8) Članovi organa Turističke zajednice Kantona za svoj rad u organima za koje su imenovani primaju novčanu naknadu, čija se visina utvrđuje godišnjim finansijskim planom i posebnom odlukom Skupštine Turističke zajednice Kantona.

## **Član 11.**

### **(Skupština Turističke zajednice Kantona)**

- (1) Skupština Turističke zajednice Kantona je najviši organ upravljanja u Turističkoj zajednici Kantona.
- (2) Skupština Turističke zajednice Kantona obavlja poslove utvrđene zakonom i statutom.
- (3) Skupštinu Turističke zajednice Kantona čine predstavnici obaveznih članova Turističke zajednice Kantona i u ime osnivača, predstavnici Ministarstva .
- (4) Broj predstavnika članova u Skupštini Turističke zajednice Kantona utvrđuje se na način da je svaka turistička zajednica općine/grada, odnosno područja zastupljena najmanje s jednim predstavnikom. Veći broj predstavnika pojedine turističke zajednice općine/grada, odnosno područja ovisi o turističkom značenju područja općine/grada ili područja za koje je osnovana, a određuje se razmjerno udjelu turističke zajednice u prihodima Turističke zajednice Kantona, u skladu sa zakonom.
- (5) Ukoliko nisu osnovane turističke zajednice općina/gradova, odnosno područja broj predstavnika članova u Skupštini Turističke zajednice Kantona utvrđuje se za administrativni teritorij općina/gradova na način definisan stavom (4) ovog člana.
- (6) Udio u prihodu iz stava (4) ovoga člana utvrđuje se prema prihodu u godini koja prethodi godini u kojoj se provode izbori za organe Turističke zajednice Kantona.

## **Član 12.**

### **(Sastav Skupštine)**

- (1) Sastav Skupštine Turističke zajednice Kantona za prvi izborni ciklus utvrđuje se prema sljedećoj strukturi članova, odnosno predstavnika obaveznih članova, po općinama Kantona:

1. GRAD TUZLA	3
2. OPĆINA BANOVIĆI	2
3. OPĆINA ČELIĆ	1
4. OPĆINA DOBOJ ISTOK	1
5. OPĆINA GRAČANICA	2
6. OPĆINA GRADAČAC	2
7. OPĆINA KALESIJA	2
8. OPĆINA KLADANJ	2
9. OPĆINA LUKAVAC	2
10. OPĆINA SAPNA	1
11. OPĆINA SREBRENİK	2
12. OPĆINA TEOČAK	1
13. OPĆINA ŽIVINICE	2
14. MINISTARSTVO TRGOVINE, TURIZMA I SAOBRAĆAJA	2
<b>UKUPNO:</b>	<b>25</b>

- (2) Za naredne izborne cikluse struktura članova, odnosno predstavnika obaveznih članova u Skupštini utvrđivat će se shodno odredbama iz člana 11. stav (4) i (6) ovog Statuta.

## **Član 13.**

### **(Način provođenja izbora za Skupštinu)**

- (1) Do osnivanja turističke zajednice općine/grada, prijedlog kandidata za Skupštinu Turističke

zajednice Kantona daje općinski/gradski organ nadležan za poslove turizma, vodeći računa da predloženi kandidati moraju biti iz reda obaveznih članova koji imaju sjedište na području nadležne općine, a broj predloženih kandidata mora biti dva puta veći od broja predstavnika općine/grada u Skupštini Turističke zajednice Kantona

- (2) Prilikom predlaganja kandidata općinski/gradski organ nadležan za poslove turizma posebno vodi računa o vrsti djelatnosti obaveznog člana i ravnopravnoj zastupljenosti svih djelatnosti kao i visini i stepenu izmirenja obaveza po osnovu boravišne takse i članskog doprinosa. Prilikom predlaganja kandidata općinski/gradski organ nadležan za poslove turizma dužan je konsultovati poslovne asocijacije (udruženja) koja djeluju na njihovom prostoru a u koje su uključeni obavezni članovi.
- (3) Konačnu listu članova Skupštine utvrđuje Ministarstvo, u prvom izbornom ciklusu, odnosno Turističko vijeće, u narednim izbornim ciklusima, a istu, na osnovu izvještaja verifikacione komisije Skupštine, potvrđuje Skupština na svojoj konstituirajućoj sjednici.
- (4) Nakon upisa turističke zajednice općine/grada u Upisnik Turističkih zajednica Skupština Turističke zajednice općine/grada može potvrditi prijedlog članova Skupštine Turističke zajednice Kantona sa područja njihove općine/grada ili predložiti druge kandidate, s tim da mandat novoizabranih članova traje do kraja mandata prethodno izabranih članova.

#### **Član 14.**

##### **(Obaveze predstavnika članova Skupštine)**

Obaveze predstavnika članova u Skupštini Turističke zajednice Kantona naročito su:

- a) redovno prisustvovanje sjednicama Skupštine Turističke zajednice Kantona;
- b) aktivno učešće u radu Skupštine Turističke zajednice Kantona;
- c) aktivno zalaganje za realizaciju odluka, zaključaka i stavova Skupštine Turističke zajednice Kantona;
- d) izvršavanje zadataka koje im povjeri Skupština Turističke zajednice Kantona;
- e) redovno učestvovanje u radu drugih tijela Turističke zajednice Kantona, kada su u ta tijela izabrani.

#### **Član 15.**

##### **(Poslovi Skupštine)**

Skupština Turističke zajednice Kantona:

- a) donosi statut Turističke zajednice Kantona,
- b) donosi poslovnik o radu Skupštine Turističke zajednice Kantona,
- c) bira i razrješava predsjedavajućeg Skupštine Turističke zajednice Kantona iz reda članova Skupštine,
- d) bira i razrješava članove nadzornog odbora Turističke zajednice Kantona, koje prema odredbama statuta bira Skupština Turističke zajednice Kantona,
- e) odlučuje o izboru i razrješenju članova Turističkog vijeća, koje prema odredbama statute bira Skupština Turističke zajednice Kantona,
- f) donosi godišnji program rada i godišnji finansijski plan Turističke zajednice Kantona,
- g) usvaja godišnji izvještaj o radu i finansijski izvještaj Turističke zajednice Kantona,
- h) donosi odluku o osnivanju i ustroju turističkog ureda,
- i) donosi odluku o izvještajima koje podnose Turističko vijeće i predsjednik Turističkog vijeća,
- j) donosi odluke i rješava druga pitanja kada je to predviđeno propisima i statutom Turističke zajednice Kantona.

#### **Član 16.**

### **( Održavanje Skupštine)**

- (1) Skupština Turističke zajednice Kantona se održava najmanje dva puta godišnje.
- (2) Predsjedavajući Skupštine Turističke zajednice Kantona saziva i predsjedava sjednicama Skupštine i za svoj rad odgovara Skupštini.
- (3) Vanredna sjednica Skupštine Turističke zajednice Kantona saziva se u slučaju:
  - a) izbora novih članova Turističkog vijeća, ukoliko se u toku trajanja mandata na koji su izabrani njihov broj smanji najmanje za dva člana, ili izbora novih članova nadzornog odbora ukoliko se u toku trajanja mandata njihov broj smanji za najmanje jednog člana;
  - b) vanrednog izbora predsjedavajućeg Skupštine, tj. ukoliko je izabranom predsjedavajućem Skupštine iz bilo kojeg razloga prestala ova funkcija;
  - c) na zahtjev: Turističkog vijeća, nadzornog odbora ili najmanje 1/3 predstavnika u Skupštini.
- (4) Podnosioci zahtjeva iz stava (3) tačka c) ovog člana, dužni su zahtjev za sazivanje sjednice obrazložiti u pisanoj formi i predložiti dnevni red za Skupštinu.
- (5) Ako predsjedavajući Skupštine ne sazove sjednicu Skupštine na zahtjev organa iz stava (3) tačka c) ovog člana, Skupštinu saziva Predsjednik Turističkog vijeća, predsjednik nadzornog odbora, jedan od predstavnika u Skupštini, koji su podnijeli zahtjev za sazivanje Skupštine.

### **Član 17.**

#### **(Odlučivanje u Skupštini)**

- (1) Skupština Turističke zajednice Kantona pravovaljano odlučuje ako je na sjednici prisutno više od polovine od ukupnog broja članova Skupštine.
- (2) Skupština Turističke zajednice Kantona donosi odluke većinom glasova prisutnih članova Skupštine, ako za pojedina pitanja ovim statutom nije drugačije određeno.
- (3) Način sazivanja i vođenja sjednica Skupštine i druga pitanja vezana za održavanje sjednica utvrđuju se Poslovníkom o radu Skupštine.

### **Član 18.**

#### **(Turističko vijeće)**

- (1) Turističko vijeće je izvršni organ i za svoj rad odgovorno je Skupštini.
- (2) Turističko vijeće:
  - a) provodi odluke i zaključke Skupštine,
  - b) predlaže Skupštini godišnji program rada i finansijski plan turističke zajednice, te godišnji finansijski izvještaj,
  - c) podnosi Skupštini izvještaj o svom radu najmanje dva puta godišnje,
  - d) upravlja imovinom Turističke zajednice Kantona u skladu sa statutom te u skladu sa programom rada i finansijskim planom,
  - e) donosi opće akte za Turistički ured Turističke zajednice Kantona,
  - f) imenuje i razrješava voditelja Turističkog ureda,
  - g) odlučuje o zapošljavanju zaposlenika u Turističkom uredu
  - h) utvrđuje granice ovlasti za zastupanje Turističke zajednice Kantona i raspolaganje finansijskim sredstvima Turističke zajednice Kantona,
  - i) donosi poslovnik o radu Turističkog vijeća,
  - j) odlučuje u 2. stepenu o pravima, dužnostima i odgovornostima zaposlenika Turističkog ureda,
  - k) obavlja i druge poslove utvrđene zakonom i statutom turističke zajednice.

### **Član 19.**

#### **(Struktura Turističkog vijeća)**

- (1) Turističko vijeće ima predsjednika koji predstavlja Turističku zajednicu.
- (2) Dužnost predsjednika Turističkog vijeća obavlja ministar trgovine, turizma i saobraćaja Tuzlanskog

kantona (u daljem tekstu: Ministar) ili osoba koju imenuje Ministar, a za svoj rad odgovara Skupštini Turističke zajednice kantona i osnivaču.

- (3) Osim predsjednika, Turističko vijeće ima šest članova.
- (4) Pet članova Turističkog vijeća bira Skupština Turističke zajednice Kantona iz redova obaveznih članova Turističke zajednice Kantona, vodeći računa o teritorijalnoj zastupljenosti i o zastupljenosti djelatnosti u turizmu (pružatelji ugostiteljskih usluga, putničke agencije i dr.), a jednog člana delegira Ministarstvo.

#### **Član 20.**

##### **(Sazivanje i odlučivanje u Turističkom vijeću)**

- (1) Turističko vijeće radi na sjednicama.
- (2) Predsjednik saziva i predsjedava sjednicama Turističkog vijeća.
- (3) U slučaju odsutnosti predsjednika, sjednicom Turističkog vijeća predsjedava član Turističkog vijeća kojeg je ovlastio Predsjednik, odnosno kojeg odredi Vijeće.
- (4) Turističko vijeće može se sazvati i kad to zatraži najmanje jedna trećina članova Turističkog vijeća, u roku od 30 dana.
- (5) Redovne sjednice Turističkog vijeća održavaju se najmanje jednom u dva mjeseca.
- (6) Turističko vijeće može pravovaljano odlučivati ukoliko sjednici prisustvuje više od polovine članova, a odlučuje većinom glasova prisutnih članova.

#### **Član 21.**

##### **(Nadzorni odbor)**

- (1) Nadzorni odbor Turističke zajednice Kantona (u daljem tekstu: Nadzorni odbor) nadzire:
  - a) vođenje poslova Turističke zajednice Kantona,
  - b) materijalno i finansijsko poslovanje i raspolaganje sredstvima Turističke zajednice Kantona,
  - c) izvršenje i provedbu programa rada i finansijskog plana Turističke zajednice Kantona.
- (2) O obavljenom nadzoru, Nadzorni odbor podnosi pisani izvještaj Turističkom vijeću i Skupštini.
- (3) Nadzorni odbor provodi nadzor iz stava (1) ovog člana svaka tri mjeseca, odnosno četiri puta godišnje.

#### **Član 22.**

##### **(Struktura Nadzornog odbora)**

- (1) Nadzorni odbor turističke zajednice ima tri člana, a čine ga:
  - a) dva člana koje bira Skupština Turističke zajednice Kantona,
  - b) jedan član kojeg delegira Vlada Kantona.
- (2) Član Nadzornog odbora ne može biti član Turističkog vijeća niti Skupštine.
- (3) Prijedloge kandidata za izbor članova Nadzornog odbora iz stava (1) tačka a) ovog člana daju članovi Skupštine vodeći računa da kandidati imaju visoku stručnu spremu.
- (4) Nadzorni odbor iz redova svojih članova bira predsjednika i zamjenika.

#### **Član 23.**

##### **(Sazivanje i odlučivanje u Nadzornom odboru)**

- (1) Sjednicu Nadzornog odbora saziva i njenim radom rukovodi predsjednik Nadzornog odbora.
- (2) Nadzorni odbor može pravovaljano odlučivati ako je na sjednici prisutna većina članova Nadzornog odbora, a odluke donosi većinom glasova od ukupnog broja članova.
- (3) Sva druga pitanja vezana za rad i odlučivanje Nadzornog odbora regulišu se poslovníkom o radu koji donosi Nadzorni odbor.



**Član 24.**  
**(Radna tijela)**

- (1) Skupština Turističke zajednice Kantona i Turističko vijeće mogu osnovati stalna i privremena radna i savjetodavna tijela (radne grupe, savjete, komisije i sl.), radi razmatranja određenog pitanja, te davanja mišljenja i prijedloga o značajnim pitanjima iz njihovog djelokruga.
- (2) Skupština Turističke zajednice Kantona i Turističko vijeće, odlukom o osnivanju tijela iz stava 1) ovog člana, utvrđuju sastav, djelokrug rada i druga pitanja vezana za njihov rad.

**Član 25.**  
**(Turistički ured)**

- (1) Skupština Turističke zajednice Kantona može, shodno potrebi, osnovati turistički ured Turističke zajednice Kantona (u daljem tekstu: Turistički ured).
- (2) U Turističkom uredu obavljaju se stručni i administrativni poslovi vezani za potrebe Turističke zajednice Kantona.
- (3) Do donošenja odluke iz stava (1) ovog člana, stručne i administrativne poslove vezane za potrebe Turističke zajednice Kantona obavlja Ministarstvo.

**Član 26.**  
**(Organizacija Turističkog ureda)**

- (1) Djelokrug, unutarnju organizaciju i sistematizaciju radnih mjesta Turističkog ureda utvrđuje Turističko vijeće na prijedlog voditelja Turističkog ureda, aktom o unutrašnjoj organizaciji i sistematizaciji radnih mjesta i poslova, kojim propisuje posebne uslove u pogledu stručne spreme, radnog iskustva, znanja jezika i drugih posebnih znanja i sposobnosti, koje moraju ispunjavati zaposleni u Turističkom uredu.
- (2) Na radne odnose zaposlenih u Turističkom uredu primjenjuju se opći propisi o radu.
- (3) Prijem zaposlenika u Turističkom uredu vrši se na osnovu javnog konkursa odnosno javnog oglasa.

**Član 27.**  
**(Poslovi Turističkog ureda)**

- (1) Turistički ured obavlja slijedeće poslove:
  - a) provodi zadatke utvrđene programom rada Turističke zajednice Kantona;
  - b) obavlja stručne i administrativne poslove u vezi s pripremanjem sjednica organa Turističke zajednice Kantona;
  - c) obavlja stručne i administrativne poslove u vezi sa izradom i izvršavanjem akata organa Turističke zajednice Kantona;
  - d) obavlja pravne, finansijske i knjigovodstvene poslove, kadrovske i opće poslove, radi evidencije i statističke podatke, utvrđene propisima i aktima Turističke zajednice Kantona, koji nisu povjereni specijalizovanim pravnim ili fizičkim licima;
  - e) izrađuje analize, informacije i druge materijale za potrebe organa Turističke zajednice Kantona;
  - f) predlaže sadržaj i prati izvršavanje programa rada i finansijskog plana Turističke zajednice Kantona;
  - g) propagandu i promociju turističke ponude Tuzlanskog kantona;
  - h) turističko informativne djelatnosti (priprema i nabavka promotivnih materijala i sl.);
  - i) obavlja i druge stručne i administrativne poslove koje mu odrede organi Turističke zajednice Kantona.
- (2) Odlukom o osnivanju i organizovanju Turističkog ureda, te njegovim općim aktima, bliže se utvrđuju poslovi Turističkog ureda.

## **Član 28.**

### **(Imenovanje voditelja Turističkog ureda)**

- (1) Turistički ured ima voditelja koji se imenuje na četiri godine na osnovu javnog konkursa i može biti ponovo imenovan, ali ne više od dva mandata.
- (2) Turističko vijeće Turističke zajednice Kantona donosi odluku o načinu raspisivanja javnog konkursa kao kriterijima i postupku izbora najuspješnijeg kandidata za voditelja Turističkog ureda.
- (3) Pored općih uslova voditelj Turističkog ureda mora ispunjavati i slijedeće posebne uslove:
  - a) da ima završen VII stepen stručne spreme: turističkog, ekonomskog, pravnog ili drugog smjera.
  - b) da ima tri godine radnog iskustva u struci od čega najmanje jednu na rukovodnim poslovima;
  - c) da mu pravomoćnom sudskom presudom ili rješenjem nije izricana mjera zabrane obavljanja poslova i rukovođenja.
- (4) Sa imenovanim voditeljem Turističkog ureda predsjednik Turističkog vijeća zaključuje ugovor o radu na određeno vrijeme, u skladu sa zakonom o radu i pravilnikom. Radni odnos voditelja turističkog ureda traje do isteka roka na koji je izabrana, odnosno njegovog razrješenja ili prestanka dužnosti iz drugih razloga.
- (5) Voditelj Turističkog ureda i drugi radnici zaposleni u Turističkom uredu ne mogu biti predsjednici niti članovi skupštine ili turističkog vijeća niti jedne turističke zajednice.

## **Član 29.**

### **(Odsutnost voditelja Turističkog ureda)**

- (1) U slučaju da voditelj Turističkog ureda podnese ostavku, bude smijenjen od strane Turističkog vijeća, zabrani mu se rad na osnovu pravosnažne sudske presude, kao i iz drugih razloga duže odsutnosti (duže teške bolesti ili smrti), predsjednik Turističkog vijeća će zastupati Turističku zajednicu Kantona, do izbora novog voditelja Turističkog ureda, ali ne duže od šest mjeseci.
- (2) U slučaju iz stava (1) ovog člana Predsjednik Turističkog vijeća može, neposredno rukovođenje radom Turističkog ureda, bez prenošenja ovlasti za zastupanje, povjeriti drugom licu, uz saglasnost Turističkog vijeća.
- (3) Obim povjerenih poslova licu iz stava (2) ovog člana će se definisati odlukom Turističkog vijeća.
- (4) Voditelja Turističkog ureda u slučaju kraće odsutnosti ili spriječenosti za rad zamjenjuje lice koje odredi voditelj, uz prethodnu saglasnost Turističkog vijeća.
- (5) Lice koje zamjenjuje voditelja Turističkog ureda ima prava i dužnosti voditelja Turističkog ureda.

## **Član 30.**

### **(Obaveze voditelja Turističkog ureda)**

- (1) Voditelj Turističkog ureda organizuje i rukovodi radom i poslovanjem Turističkog ureda i u granicama utvrđenih ovlaštenja odgovoran je za poslovanje Turističke zajednice Kantona.
- (2) Voditelj Turističkog ureda:
  - a) provodi odluke Skupštine i Turističkog vijeća;
  - b) organizuje izvršenje zadataka Turističke zajednice Kantona;
  - c) zastupa Turističku zajednicu Kantona i poduzima pravne radnje u ime i za račun Turističke zajednice Kantona;
  - d) zastupa Turističku zajednicu Kantona u svim postupcima pred sudovima, upravnim i drugim državnim tijelima, te pravnim osobama s javnim ovlaštenjima;
  - e) odgovoran je za namjensko trošenje sredstava koja se vode u Turističkoj zajednici Kantona;

- f) usklađuje materijalne i druge uslove rada Turističkog ureda i brine se da poslovi i zadaci budu na vrijeme i kvalitetno obavljeni, u skladu sa odlukama, zaključcima i programom rada Turističke zajednice Kantona i njenih organa;
  - g) predlaže zapošljavanje zaposlenika u Turističkom uredu;
  - h) odlučuje o raspoređivanju zaposlenika na određena radna mjesta, te o prestanku rada, u skladu sa aktom o organizaciji i sistematizaciji Turističkog ureda, kojeg usvaja Turističko vijeće;
  - i) upozorava organe Turističke zajednice Kantona na nezakonitost njihovih odluka;
  - j) odlučuje o službenim putovanjima uposlenika;
  - k) odlučuje o korištenju ličnih automobila u službene svrhe i o korištenju sredstava reprezentacije;
  - l) predlaže organizaciju i sistematizaciju Turističkog ureda, kao i druge opće akte neophodne za funkcionisanje Turističkog ureda;
  - m) ako ocijeni da je to potrebno i svrsishodno i u cilju izvršavanja zadataka Turističke zajednice Kantona predlaže Turističkom vijeću povjeravanje pojedinih stručnih poslova trećim licima;
  - n) potpisuje poslovnu dokumentaciju Turističke zajednice Kantona;
  - o) zajedno sa predsjednikom Turističkog vijeća priprema sjednice Turističkog vijeća i Skupštine;
  - p) podnosi Turističkom vijeću izvještaj o svom radu i o radu Turističkog ureda, te predlaže mjere za unapređenje organizacije rada Turističkog ureda;
  - q) daje punomoći i prokuru u skladu sa svojim ovlaštenjima;
  - r) rješava u I stepenu o pravima, obavezama i odgovornostima zaposlenika Turističkog ureda
  - s) obavlja i druge poslove utvrđene zakonom, aktima i odlukama Turističke zajednice.
- (3) Voditelj turističkog ureda za svoj rad odgovoran je Turističkom vijeću.

### **Član 31.**

#### **(Prijevremeno razrješenje voditelja)**

- (1) Voditelj Turističkog ureda može biti razriješen i prije isteka vremena, na koje je imenovan:
  - a) na lični zahtjev;
  - b) ako zbog neizvršenja ili nemarnog vršenja dužnosti Turistička zajednica Kantona nije mogla izvršiti zadatke, ili je izvršenje zadataka bilo znatno otežano;
  - c) ako je usljed nezakonitog, nesavjesnog ili nepravilnog rada ili zbog prekoračenja ovlaštenja nastala ili mogla nastati veća šteta;
  - d) u drugim opravdanim slučajevima (neusvajanje izvještaja o radu, teža bolest, i dr.).
- (2) Prijedlog za pokretanje postupka za razrješenje voditelja Turističkog ureda mogu podnijeti Skupština Turističke zajednice Kantona, 1/3 članova Turističkog vijeća i osnivač, odnosno Ministarstvo.
- (3) Voditelja turističkog ureda razrješava Turističko vijeće većinom glasova prisutnih članova.
- (4) U postupku prijevremenog razrješenja voditelju Turističkog ureda se mora omogućiti izjašnjenje o razlozima za razrješenje i utvrditi relevantne činjenice kojima se dokazuje postojanje razloga za prijevremeno razrješenje.
- (5) Voditelj Turističkog ureda ima pravo prigovora Turističkom vijeću na odluku o razrješenju u roku od 15 dana od dana prijeme odluke.

### **Član 32.**

#### **(Finansijsko poslovanje)**

- (1) Turistička zajednica Kantona nastupa u pravnom prometu samostalno, u svoje ime i za svoj račun.

- (2) Za obaveze u pravnom prometu Turistička zajednica Kantona odgovara cjelokupnom svojom imovinom.
- (3) Finansijsko-materijalno poslovanje Turističke zajednice Kantona vodi se po propisima koji uređuju računovodstvo neprofitnih organizacija.
- (4) Vlada Kantona ne odgovara za obaveze Turističke zajednice Kantona

### **Član 33.**

#### **(Godišnji program rada i finansijski plan)**

- (1) Turistička zajednica je obavezna koristiti raspoloživa finansijska sredstva u skladu sa programom rada i finansijskim planom.
- (2) Prijedlog programa rada i prijedlog finansijskog plana za narednu godinu, Turističko vijeće Turističke zajednice Kantona podnosi Skupštini do kraja novembra tekuće godine.
- (3) Skupština Turističke zajednice Kantona je dužna do kraja tekuće godine donijeti program rada i finansijski plan za narednu godinu.

### **Član 34.**

#### **(Sadržaj programa rada i finansijskog plana)**

- (1) Godišnji program rada i finansijski plan Turističke zajednice Kantona obavezno sadrže sve pojedinačno utvrđene planirane zadatke i potrebna finansijska sredstva za njihovo izvršenje.
- (2) Prijedlog programa rada i finansijskog plana iz stava (1) ovoga člana, obavezno se dostavlja na razmatranje članovima Skupštine osam dana prije održavanja sjednice na kojoj se isti donose.
- (3) Skupština Turističke zajednice Kantona donosi godišnji program rada i finansijski plan uz prethodnu saglasnost Ministarstva.
- (4) Tokom godine Turistička zajednica Kantona može mijenjati i dopunjavati svoj program rada i godišnji finansijski plan.
- (5) Ako tokom godine dođe do odstupanja od utvrđenog programa rada i finansijskog plana Turistička zajednica Kantona je dužna donijeti izmjene, odnosno dopune programa rada i finansijskog plana.
- (6) Izmjene programa rada i finansijskog plana iz stava (4) i (5) ovoga člana obavljaju se na način i prema postupku kojim se donosi program rada i finansijski plan.

### **Član 35.**

#### **(Godišnji finansijski izvještaj)**

- (1) Skupština Turističke zajednice Kantona je dužna do kraja marta tekuće godine usvojiti godišnji finansijski izvještaj za prethodnu godinu.
- (2) Prijedlog godišnjeg finansijskog izvještaja za prethodnu godinu Turističko vijeće podnosi Skupštini do kraja februara tekuće godine.
- (3) Godišnji finansijski izvještaj za prethodnu godinu Turistička zajednica Kantona dužna je dostaviti Ministarstvu.
- (4) Godišnji finansijski izvještaj obavezno sadrži podatke o izvršenju programom rada pojedinačno utvrđenih zadataka, izdacima njihovog izvršenja, izdacima za poslovanje Turističkog ureda i rad organa Turističke zajednice Kantona, ostvarenju prihoda po izvorima, finansijskom rezultatu poslovanja, usporedbu finansijskog plana i njegovog ostvarenja s obrazloženjem odstupanja, analizu i ocjenu izvršenja programa, te procjenu učinka poduzetih aktivnosti na razvoj turizma, kao i nalaz ovlaštene revizorske kuće.
- (5) U finansijskom planu Turističke zajednice može se izdvojiti dio prihoda kao neposredna sredstva (tekuća rezerva), koja se koristi cijele godine za nepredviđene ili nedovoljno predviđene poslove i zadatke, a koji se finansiraju iz finansijskog plana Turističke zajednice.
- (6) Sredstvima tekuće rezerve raspolaže Turističko vijeće.

- (7) Prijedlog godišnjeg finansijskog izvještaja mora se staviti na uvid članovima Skupštine osam dana prije razmatranja na Skupštini Turističke zajednice Kantona.

### **Član 36.**

#### **(Odgovornost za izvršenje)**

- (1) Za izvršenje programa rada i godišnjeg finansijskog plana odgovorno je Turističko vijeće i voditelj Turističkog ureda.
- (2) Naredbodavac za izvršenje programa rada i finansijskog plana je Turističko vijeće i voditelj Turističkog ureda.

### **Član 37.**

#### **(Prihodi)**

- (1) Prihodi Turističke zajednice Kantona su:
  - a) boravišna taksa,
  - b) članski doprinos,
  - c) prihodi od obavljanja privrednih djelatnosti iz člana 3. stava (2) Zakona o turističkim zajednicama ("Službene novine Tuzlanskog kantona" br. 11/15).
- (2) Osim prihoda iz stava (1) ovoga člana Turistička zajednica Kantona može ostvarivati prihode i iz :
  - a) budžeta, na osnovu posebnih programa,
  - b) dobrovoljnih priloga i darova,
  - c) imovine u vlasništvu i sl.
- (3) Turistička zajednica Kantona se može, na osnovu posebne odluke Turističkog vijeća, finansijski zaduživati u cilju realizacije programa rada i finansijskog plana, ali ukupna vrijednost zaduženja ne smije prelaziti 50% finansijskim planom predviđenih prihoda.
- (4) Višak prihoda nad rashodima koristi se u svrhu unapređenja turističkog područja Turističke zajednice Kantona.

### **Član 38.**

#### **(Transakcijski računi)**

Turistička zajednica Kantona ima račune kod poslovnih banaka na kojima se vode njena novčana sredstva.

### **Član 39.**

#### **(Stjecanje imovine)**

- (1) Turistička zajednica Kantona može stjecati pokretne stvari, nekretnine i imovinska prava.
- (2) Turističko vijeće upravlja imovinom Turističke zajednice Kantona s pažnjom dobrog i savjesnog privrednika.
- (3) Za nabavku, otuđenje i opterećenje nekretnina Turističke zajednice Kantona Turističko vijeće je dužno tražiti prethodnu saglasnost Skupštine Turističke zajednice Kantona i Vlade Kantona.
- (4) Imovina obezbijedena od strane Kantona koju koristi Turistička zajednica Kantona, je imovina Kantona.
- (5) Ministarstvo vrši nadzor nad zakonitošću raspolaganja imovinom koju koristi Turistička zajednica Kantona.

### **Član 40.**

#### **(Javnost rada)**

- (1) Rad Turističke zajednice je javan.
- (2) Javnost rada Turističke zajednice osigurava se i ostvaruje dostavom pisanih materijala i putem sjednica organa Turističke zajednice, objavom na oglasnoj ploči, pozivanjem na sjednice predstavnika sredstava javnog informisanja ili na drugi prikladan način.

- (3) Predsjednik Turističkog vijeća i voditelj Turističkog ureda odgovorni su za redovno, potpuno i, po obliku i sadržaju, pristupačno informisanje javnosti o radu Turističke zajednice.

**Član 41.**  
**(Poslovna tajna)**

- (1) Poslovnu tajnu Turističke zajednice Kantona čine isprave i podaci, čije bi odavanje neovlaštenom licu bilo protivno poslovanju Turističke zajednice ili štetilo interesima i poslovnom ugledu Turističke zajednice Kantona.
- (2) Predsjednik Turističkog vijeća i voditelj Turističkog ureda određuju koje isprave i podaci su poslovna tajna, kao i ostala pitanja u vezi s poslovnom tajnom.
- (3) Poslovnu tajnu dužni su čuvati svi članovi i zaposleni u Turističkoj zajednici Kantona, koji na bilo koji način saznaju za ispravu ili podatak koji je utvrđen kao poslovna tajna.
- (4) Povreda odredaba ovog statuta, koja se odnosi na poslovnu tajnu, teža je povreda radne dužnosti.
- (5) U ugovoru o radu će se regulisati pitanje čuvanja poslovne tajne za vrijeme i nakon prestanka radnog odnosa.

**Član 42.**  
**(Raspuštanje organa)**

- (1) Vlada Kantona može donijeti odluku o raspuštanju Skupštine Turističke zajednice Kantona u skladu sa zakonom.

**Član 43.**  
**(Statut i drugi opći akti)**

- (1) Turistička zajednica ima statut i druge opće akte (pravilnici, odluke, poslovnici idr.).
- (2) Opći akti moraju biti u saglasnosti sa odredbama zakona i ovog statuta.
- (3) U slučaju nesaglasnosti općih akata sa statutom primjenjivat će se odgovarajuće odredbe statuta.
- (4) Ocjenu saglasnosti općih akata sa statutom daje Skupština Turističke zajednice Kantona Turističke zajednice Kantona.
- (5) Kada utvrdi da opći akt nije u saglasnosti sa statutom, Skupština Turističke zajednice Kantona svojom odlukom ukida ili poništava taj akt, odnosno njegove pojedine odredbe.
- (6) Tumačenje općih akata daje organ koji ih je donio.

**Član 44.**  
**(Stupanje na snagu statuta i drugih općih akata)**

- (1) Statut stupa na snagu danom donošenja, a objavljuje se u "Službenim novinama Tuzlanskog kantona".
- (2) Opći akti Turističke zajednice oglašavaju se na oglasnoj ploči Turističke zajednice.
- (3) Opći akti stupaju na snagu na dan utvrđen tim aktom, ali ne prije dana objavljivanja na mjestu predviđenom za oglašavanje.

**Član 45.**  
**(Donošenje statuta i drugih općih akata)**

- (1) Statut donosi Skupština Turističke zajednice Kantona većinom glasova svih predstavnika obaveznih članova u Skupštini, uz prethodnu saglasnost Ministarstva.
- (2) Poslovnik o radu Skupštine donosi Skupština Turističke zajednice Kantona većinom glasova prisutnih predstavnika.

(3) Ostale opće akte donosi Turističko vijeće, na prijedlog predsjednika ili na vlastitu inicijativu, a opće akte koji se odnose na Turistički ured, na prijedlog voditelja Turističkog ureda.

**Član 46.**  
**(Izmjene i dopune statuta)**

- (1) Odluka o izmjenama i dopunama statuta donosi se u postupku i na način određen za donošenje statuta.
- (2) Inicijativu za izmjene i dopune statuta može podnijeti Turističko vijeće ili najmanje deset članova Skupštine.
- (3) Nacrt Odluke o izmjenama i dopunama statuta dostavlja se predstavnicima u Skupštini radi davanja primjedbi i prijedloga.
- (4) Primjedbe i prijedlozi na nacrt Odluke o izmjenama i dopunama Statuta dostavljaju se Turističkom vijeću, u roku od osam dana od dana prijema nacrta.
- (5) Nakon razmatranja primjedbi i prijedloga na nacrt odluke, Turističko vijeće utvrđuje prijedlog izmjena i dopuna Statuta, dostavlja ga Ministarstvu radi dobijanja saglasnosti, te ga upućuje Skupštini na donošenje.

**Član 47.**  
**(Drugi opći akti)**

Drugi opći akti Turističke zajednice Kantona su:

- a) pravilnik o računovodstvu i finansijskom poslovanju;
- b) pravilnik o radu,
- c) pravilnik o unutrašnjoj organizaciji i sistematizaciji radnih mjesta,
- d) pravilnik o plaćama i drugim ličnim primanjima zaposlenika;
- e) drugi akti u skladu sa zakonom i drugim propisima.

**Član 48.**  
**(Dodjela priznanja i nagrada)**

- 1) Posebno zaslužnim pojedincima i organizacijama za promovisanje i razvoj turističke djelatnosti Turistička zajednica Kantona može uručiti priznanja i nagrade.
- 2) Odluku o vrstama priznanja, kriterijima za dodjelu i imenovanju komisije za provođenje izbora dobitnika i dodjelu priznanja donosi Turističko vijeće.

**PRIJELAZNE I ZAVRŠNE ODREDBE**

**Član 49.**

Turističko vijeće je dužno donijeti opće akte u skladu sa odredbama ovog statuta u roku od mjesec dana od dana objavljivanja statuta.

**Član 50.**

Stupanjem na snagu ovog statuta prestaje da važi Statut Turističke zajednice Tuzlanskog kantona ("Službene novine Tuzlanskog kantona" broj 12/11).

Bosna i Hercegovina  
Federacija Bosne i Hercegovine  
Tuzlanski kanton  
Turistička zajednica  
Broj:193/16  
Tuzla, 12.07. 2016. godine



P R E D S J E D N I K  
SKUPŠTINE TURISTIČKE ZAJEDNICE